



Noticia filatelico di servicio postal di Aruba



ORANJESTAD (AAN) – Cu gran placer, Director di Servicio Postal di Aruba a presenta na DIARIO e stampianan y e first-day-covers di su edicion special „DEFINITIVE STAMPS III 2001”, cualnan a worde emiti dia 31 di Januari, 2001 y diseña pa Mr. Nigel Matthew, ademas e siguiente informacion pa Pueblo di Aruba:

“Dia 31 di Januari, 2000, SERVICIO POSTAL di Aruba a emiti cuatro (4) „Definitive Stamps III 2001”.

E stampianan aki lo ta obtenible na Servicio Postal na San Nicolas, Noord, Royal Plaza, Piedra Plat y Oranjestad, a cuminza for di Januari 31, 2001 y lo ta obtenible pa un periodo indefinido.

Den su informe SERVICIO POSTAL ta splica y ademas „Definitive Stamps III 2001” ta ilustra cuatro (4) animal domestico cu nan informacion di cual DIARIO ta tece dos den edicion di awe cu ta e PUSHI y e TORTUGA.

E PUSHI – Stampia 5c: “Desde antigüedad e PUSHI, cual ta hiba e nomber na Latijn *Felis catus Linnaeus* a ser domestica y for di e tempo ey a biba den hende.

Nan ta carga e signo di nan linahe salbahe den nan marcanan strepia of motea, cu ta destaca den hopi pushi y microscopicamente visible te hasta den pushinan di colornan consistente.

Tin aproximadamente 36 variedad di cria felino conoci plama riba henter mundo. Basicamente, nan por worde agrupa den “lananan largo” y “lananan cortico” y recientemente lananan di krul!

Segun estudionan haci pa e Prof. Hooyer na 1960, un cria di pushi casi pareci na e *Felis tigrina* Schreber tabata existi den e periodo pre-Colombino, aki na Aruba.

Hende lo a gusta hiba e creencia cu “pushinan brabo” berdadero ta existi na Aruba y Antillas, pero e “pushinar brabo” aki ta nada otro cu pushinan domestico cu a slenter bay.

Na 1938 Prof. Jonkers a indica cu e asina yama “pushinan brabo” ta birando un peligro pa nos fauna.

No solamente nan ta come djaca y raton, pero tambe tur sorto di parha, lagadishi y coneu!

E pushi domestico comun cu nos ta familiariza cu ne na Aruba ta un descendiente di e pushi “Nubian” cu te ainda ta slenter den selva na Egipto.

E TORTUGA – Stampia 30c: “E tortuga aki ta un tortuga cu ta lastra y ta biba solamente riba tera. Esaki ta distingie di e tortuga macho cu nunca ta bandona lama, cu excepcion di su pareha cu ta bay pone su webonan na oriya di lama.

Tur tortuga ta reptilnan y pesey, apesar cu e por ta increíble pa kere, nan ta relaciona cu lagadishi, cocodrilo y te hasta culebranan.

E característica mas impactante cu nan tin en comun ta nan cuero di concha. Riba tortuga e ta solamente observable riba nan patanan, cabez y rabo.

E parti mas largo di nan curpa ta cubri pa e amazon,

di cual e parti exterior ta consisti di escalanan puntiagudo creci den otro cu ta protehe e animal.

Ta pesey cu e tortuga por permiti su mes di move lentamente y trankil na momento di cualkier peligro, simplemente nan ta retrocede den nan “cas” te ora cu peligro pasa.

Pero, si nan mester cai riba nan lomba, nan peso ta haci masha difícil pa nan por lanta para riba nan patanan. Otro característica di nan ta nan dependencia na e temperatura den aire libre.

Nan por move, come, digeri y crece, solamente ora ta cayente. Mientras mas friu, mas lento reptilnan ta bira y te hasta ta perde nan apetit. Ta pesey cu mas tanto nan ta ser haya na paisnan calido.

E “morocoy” manera e ta worde yama na Papiamentu, ta descendiente di e South American Yellowfooted Tortoise (*Geochelone denticulata*) y por ta cu esaki ta e explicacion di con nan ta sinti

nan mes mas mihor na cas na Aruba.

Den e siguiente edicion DIARIO ta bin cu mas informacion encuanto e informacion filatelico di SERVICIO

POSTAL

Por haci pedido na e SERVICIO FILATELICO, na Servicio Postal na Oranjestad, Aruba.